

Adattà la lescha a la constituziun

Revisiun da la lescha davart l'organisaziun da las dretgiras

■ (anr/rgd) L'onn 2012 ha la populaziun grischuna acceptà a l'urna la refurma dal territori. Questa midada da la constituziun pretendia uss in'adattaziun da diversas leschas chantunalas.

La refurma dal territori chantunala, acceptada a l'urna dal pievel grischun l'onn 2012, ha abolì la muntada giuridica dals circuls ed introducì indesch regiuns. L'unica funcziun ch'ils circuls mantegnan è da servir sco circuls electorals per il cussegl grond. La midada da la constituziun pretendia in'adattaziun da singulas leschas. La decisiun da consegnaziun da las singulas vischnancas a las regiuns aveva il cussegl grond prendì en la sessiun d'avrigl dal 2014. Encunter questa decisiun era vegnì prendì il referendum ch'è dentant vegnì sbittà dal pievel. Las autoritads chantunalas realiseschan las revisiuns necessarias pass per pass. En la sessiun d'october ha il parlament chantunal revedì la lescha davart l'organisaziun giudiziala che regla las cumpetenzas da las differentas dretgiras dal chantun.

Text da lescha tudestg divergent al talian e rumantsch

La revisiun parziala da la lescha davart l'organisaziun giudiziala n'è sco tala

betg stada dispitaivla en il cussegl grond. En la votaziun finala n'ha nagin deputà opponì encunter il project, da moda che tal è vegnì approvà unanimamain cun 111 vuschs. Sulettamain la deputada indipendente *Nicoletta Noi* (senza partida, Roveredo) è s'abstegnida da sia vusch. Quest protest as drizza vers l'artitgel che regla il resguardar las trais linguas uffizialas dal Grischun en las dretgiras chantunalas. Noi criticgescha la differenza en il text da lescha en la versiun taliana e rumantscha ed il text tudestg. La versiun tudestga pleda mo che las trais linguas sajan «da resguardar a moda adequata», durant che las translaziuns talianas e rumantschas cuntengnan qua in imperativ. Nicoletta Noi pretendia l'adattaziun al text talian e rumantsch ch'èn pli determinants en quest artitgel. Er deputà *Illario Bondolfi* (pcd, Cuira) ha fatg attent ch'ina consideraziun adequata da las trais linguas uffizialas d'uesia sa chapir da sez en in chantun triling. Malgrà la «settimana della lingua italiana nel mondo» refusa il parlament chantunale a Cuira l'adattaziun da l'artitgel cun 79 vuschs encunter 30 tar trais abstenziuns. Gnanc tut ils deputats da lingua taliana e rumantscha han pia dà sua-

tientscha a l'argumentaziun da Nicoletta Noi.

Tschentada da cumin e gardaroba cunvegnenta

L'adattaziun da la lescha davart l'organisaziun giudiziala chantunala regla er la posiziun dals anteriurs cumins a circuls electorals. Deputada *Brigitta Hitz* (pld, Curvalda) ha pledà cun success da betg pretender per forza elecziuns a l'urna en tut il chantun. Sis circuls avevan tschernì lur deputads per il cussegl grond l'onn 2014 a chaschun d'ina mastralia. Il parlament ha acceptà cun 70 encunter 42 vuschs tar ina abstenziun la proposta da Hitz e lubescha als circuls d'eleger ses deputads a Cuira tenor agen parairi. Betg success ha gì suppleant *Patrik Degiacomi* (ps, Cuira) cun ses intent da stritgar in passus en la lescha che regla la gardaroba avant tribunal. Per evitar la discriminaziun da personas pli povras propona el da desister a la formulaziun «Partidas (...) ston cumparair (...) en vestgadira correcta che respecta la dignitad da la dretgira». Degiacomi n'ha betg chattà la maioritad necessaria en il cussegl grond, sia proposta è vegnida refusada cun 87 cunter 21 vuschs tar ina abstenziun.



En il cussegl grond èn vegnidas tractadas questa emna tematicas fitg multifaras.